

Date – 13/02/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Vawiinah World Radio Day hman a ni dawn.
- 2. Mizorama Village Council inthlanah hriat theih chinah vote zaa 75.26 a tlaa, Aizawl Municipal Corporation ah vote zaa 63.87 a tlaa, Lunglei Municipal Council ah zaa 70.39 a tla a ni.
- 3. Lunglei District chhunga Lalnutui VC Constituency-ah vawiin hian vote thlak a ni dawn.
- 4. Prime Minister Narendra Modia chuan tukin khan US a thleng.

<><><>

RADIO DAY

Vawiin hi World Radio Day a ni a. Kumtinin February ni 13 ah hian Radio Day hman thin niin mipuite hnenah Radio pawimawhna leh thu pawimawh hriatna kawnga Radio Day thatna inzirtir thin a ni a. Radio avanga mipui inpumkhatna lo awm leh mi nuna nghawng tha a neihte inhrilhtharna ni atan hman thin a ni bawk. Kumin Radio Day ah hian thupuihah Radio & Climate Change tih chu hman a ni. Radio Day puala a thuchahah Prasar Bharati Chairman Navneet Kumar Sehgal chuan Radio hmanga thu leh thla thehdarh avangin hnam leh eibar hmasawwnnaah an pawimawh hle a ti.

Akashvani Director General Dr. Pragya Paliwal Gaur pawhin kum 90 chhung chu radio chuan a ngaithlatute hnenah thu leh hla rinawm takin a lo pe tawh thin a ti.

(Newsonair)

<><><>

SEC

Mizorama Village Council inthlanah hriat theih chinah vote zaa 75.26 a tlaa, Aizawl Municipal Corporation ah vote zaa 63.87 a tlaa, Lunglei Municipal Council ah zaa 70.39 a tla a ni.

Aizawl District ah vote zaa 76.07 a tla a, Lunglei Dist ah zaa 80.89, Serchhip District ah zaa 76.44, Champhai District ah zaa 71.75, Mamit Dist ah zaa 77.27, Kolasib Dist zaa 73.42, Saitual Dist ah zaa 70.77, Khawzawl Dist ah zaa 74.58 leh Hnahthial Dist ah zaa 74.41 a tla a ni.

Mizoram State Election Commission ruahman danin nizan khan Mizoram chhunga Local Council leh Village Council inthlan a vote tla te chu chhiar nghal a ni a, result kimchang nghah mek a ni a, tun thlenga SEC chhian chhiah danin, ZPM in seat 231 an la a, MNF 126 IND 8, HPC Ni,l BJP nil a la ni rih a ni.

<><><>

ARMS HAUL IN SOUTH MIZORAM

Village Council leh Local Council inthlan kaihhawiha venhimna kenkawh kawnga beihpui thlakna kal zelah Lunglei SP Jerome Lalmuankima hma laknain District Special Branch te chuan Dan kalha tawlhruk Silai leh a mu tam tham tak an man.

Lunglei District Special Branch leh Excise & Narcotics tangdunin an man hi Thenzawl atanga lokal lirthei pakhat atangin a ni a, Lunglei Bazar area ah man niin dan kalha tawlhruk an man te hi AK 47 pahnih, M4 Carbine panga leh a magazine 20 bakah silaimu thahnem tak leh Pawisa fai Rs. 49,550/- leh ID card, ATM Card, Sim Card leh Mobile phone panga an man a, hemi kaihhnawihah hian Roni Chakma (kum 45) Tripura lam mi leh Anirban Chakma (kum 34) Lawngtlai District ami leh Ribeng (kum 24) Lunglei ami te chu man an ni a, Tun tuma Silai leh a mu man te hi Mizoram ah vawi khat a Silai leh a mu man tam ber tum te zing ami ni a hriat a ni.

(DESK)

<><><>

LADC

Nikum May ni 7 atanga Lai Autonomous District Council a Congress leh MNF Party Sorkar intawm chu a tlu a, nimin khan Chief Executive Member Pu C.Lalmuanthanga’n banna Governor hnen ah LADC Chairman Pu VL Hmuaka kaltlangin a thehlut a ni.

Mipui thlan member 25 awmna LADC ah Congress leh MNF Party ten United Legislature Party dina thla riat leh tlem Sorkarna an chelh hnu ah ZPM Legislature Party leh an mahni thlawptu pahnih nen Member 13 nei chuan LADC a Sorkar dinglai chuan thlawptu a ngah tawklo tih Governor-a an thlen hnu ah, Governor ruahmanna angin vawiin chawhma dar 10:30 khan LADC Emergency Session kohvin Floor Test neih tura tih ni mahse, Session ah Chairman Pu VL Hmuaka chuan Chief Executive Member Pu C.Lalmuanthanga chu CEM atanga a ban thu House ah puangin, Sorkar dinglai a tluk thu a sawi a, Floor Test neih ngai a nih tak loh vangin Session a titawp a ni.

LADC Chairman Pu VL Hmuaka chuan Lawngtlaia Akashvani palai zawhna chhangin, LADC ah Sorkar thar dintur chuan Governor hnen ah Sorkarna siamturten an thlen leh phawt a ngaih thu a sawi a, Hetihlai hian United

Legislature Party atanga ZPM thlawptu Elected Member pahnih Pu V.Zirsanga leh Pu Lallawmsanga Apetow te chuan MNF Party atanga banna nimin khan an thehlut a ni.
Dan pangai ang chuan kumin kumtawp lam ah LADC ah hian Inthlanpui neihtur a ni.

(Lalnggheta Ralte PTC Lawngtlai)

<><><>

LALNUTUI POLL DAY

Lunglei District chhunga Lalnutui VC Constituency-ah vawiin hian vote thlak a ni a,
Lalnutuiah hian VC candidate a thih avangin nimin khan a nawlpui ruala inthlan buatsaih hman a ni ta lo va, tukin dar 7 hian vote thlak hun hawn a ni a, tlai dar 4 thleng hawn a ni ang.
Lalnutui polling party te hian DC office-a despatch counter atangin inthlan buatsaihna tur hmanrua leh bungruate lam khawmin, an bungruate an endik fel vek hnuah an duty-na tur hmun hi an pan a. Polling party-ah hian inthlan huaihawttu tur Returning Officer (RO)-te, inthlan buaipuitu tur Presiding Officer (PRO), leh Polling Officer (PO)-te, venhimna hna thawk tur security-te leh lirthei khalhtute an tel a ni.
Lalnutui VC-ah hian seat 3 (general seat 2 leh reserved seat 1) awmin, inthlan chuhtu candidate mi 10 (general seat-ah 8 leh reserved seat-ah 2) an awm a. Indian National Congress (INC) candidate 2, Mizo National Front (MNF) candidate 2, Zoram People's Movement (ZPM) candidate 3 leh Independent candidate 3 an awm a ni.
Lalnutuiah hian vote nei mi 192 (mipa 94 leh hmeichhia 98) an awm a ni.

(PR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.
Vawiin chawhnu dar 2 leh a chanve-ah Chanchinthar hi puan leh a ni ang.

<><><>

RS MP

Parliamentary Committee on Railway meeting, Thawhtanni kal taa Parliament Committee Room a thutkhawmah Rajya Sabha MP Pu K.Vanlalvena chuan rawtna leh ngenna chi hnih a thlen a.
MP chuan Bairabi leh Sairang Rel kawng siam mek chu zawh a nih dawn hnaih thu report pe in Sihhmui Rel Station chu Myanmar ramri thleng a siam ngei a tul thu leh chu chu Economic hmasawнна atan leh ram venhimna atana thil pawimawh a nih thu a sawi a.
Railway hnuai a hna lak thar tur te exam centre Guwahati ah chauh a awm avangin Mizoram atanga exam a harsat thin thu sawiin Aizawlah Exam centre dah ngheh ve a tul thu a sawi chhuak bawk.
Parliamentary Committee on Railway meeting hi Chairman ni lai Pu CM Ramesh an a kaihruai a. MP 20 leh Railway official te an tel bawk a ni.

(DIPR)

<><><>

PM

Prime Minister Narendra Modia chuan tukin khan US a thleng. Hlawhtling taka France a tlawh hnuah PM Modia hian US Presidetn Donald Trump-a sawmna angin Washington a thleng a. US President Donalh Trump nen an inkawm dawn a ni. US-a India palai Vinay Mohan Kwatra leh mi paiwmawh dangten Prime Minister Modia hi airport ah an lo hmuak a. Hei bakah hian India mi cheng tam takin khawpui chhungah an lo hmuak bawk a ni.Prime Minister Modia hian US sawrkar hotute, sumdawng liante leh India mi chengte a kawm dawn bawk a ni.
Prime Minister Narendra Modia hian France-a a cham chhungin AI Action Summit ah hun an hmang a. Marseille-a India Consulate hmasa ber an hawng a. Mazargues Wara Cemetery ah Indopui pakhatna leh pahnihnaa India sipai thi hriatrengna hmun an tlawh bawk a ni.

(Newsonair)

<><><>